

Rosabelle Illes a participa na Winternachten Festival di Literatura



DEN HAAG – Recientemente a tuma luga e 25 edicion di Winternachten Festival Internacional di Literatura na Den Haag, Hulanda. Pa e ocasion aki, autor Arubiano Rosabelle Illes a keda invita pa comparti su obranan pa prome biaha na Hulanda.

Durante e Opening Night,

algun minuut prome cu e inicio di e festival, Illes a keda informa cu e lo habri e anochi cu un di su poemanan. Den e presentacion aki, el a wordo acompaña pa e Royal Conservatoire The Hague String Quartet como cu un di e studiantenan a composita un cantica specialmente pa Illes su poema despues di a les'e algun siman prome.

“E estudiante yama Hesce Mourits, e ta toca cello y e tin 18 aña di edad. Ora cu mi a tende cu el a scoge mi poema mi a keda hopi contento pa motibo cu mi ta gusta colabora cu otro artista ora di presenta mi obranan. E piesa cu Hesce a composita ta sumamente bunita”, Illes a expresa.

Durante e 5 dianan di Winternachten, Rosabelle a atende reunionnan cu autor-nan internacional y a presen-



ta su obranan na diferente eventonan den e ciudad di Den Haag. Un sesion cu e

tawata nervioso pa forma parti di dje tawata tocante storia y poesia di Surnam y Aruba hunto cu e autor renombrado Cynthia McLeod. “E buki revolucionario ‘Hoe duur was de suiker’ di Cynthia McLeod a keda publica na 1987. E mesun aña aki ami a nace, pues naturalmente mi tawata sinti mi mes intimidada pa comparti e escenario cu un autor di Cynthia su caliber”, Illes ta conta. “Pero mi a siña hopi den tiki dia. Mi a conoce diferente autor di Turkia, Sur-Africa, Palestina y Indonesia. Tambe mi a experiencia spoken word di artistanan Hulandes riba nivel halto. Mi ta regresa Aruba inspira y hopi agradecido na e organisadonan pa e oportunidad valioso aki.”

Rosabelle ta autor di 3 buki di poesia y storianan cortico y su ultimo publicacion ta un buki multilingual pa mucha titula Curasonchi (Hearty), cu el a skirbi hunto cu Levi Silvanie. Pa mas informacion tocante Rosabelle su obranan por bishita www.rosabelleilles.com

